



**COMUNU DE SANTA JUSTA**  
Provìntzia de Aristanis

**REGULAMENTU DE SA CUMPANGIA  
BARRACELLARI**

**Allegau a sa Delìbera de su Consillu Comunali n. 31 de su 31.7.2020**

## **Art. 1 – Costituzioni e durada e annoamentu.**

Su Comunu at costituiiu una cumpangia barracellari (prus ananti “cumpangia”, segundu a sa lei regionali 15.07.1988 n. 25 (prus ananti “lei”), cun sedi legale in su Municìpiu in sa bia de Garibaldi n. 84 in Santa Justa.

Sa costituzioni de sa cumpangia e sa nòmina de is chi ndi faint parti est a manera voluntària.

Sa cumpangia si fait in unu tempus movendi de su primu de su mesi de ladàmini finas a su 31 de su mesi de idas, abarrat in càrriga (tres) annus e dda torrant a annoai in automàticu tres annus in fatu candu, assumancu 6 (ses) mesis in antis de sa scadèntzia, non si fait disdeta o su Consillu Comunali deliberat a manera differenti. In ònnia modu, cuncordendi-ddu apari Consillu Comunali e cumpangia, si podit prorrogai sa durada finas a intrai in servìtziu sa cumpangia noba.

S’annoamentu de sa Cumpangia est de pigai in automàticu ònnia borta chi su Consillu Comunali ndi aprovat sa cumpositzioni noba (po ai tentu contu de dimissionis, de genti lassada foras, de mortus o de s’intrada de cumponentis nous, candu nòminat unu Capitanu nou.

## **Art. 2 - Cumpetèntzias.**

Sa cumpangia fait is funtzionis chi ddi donat sa lei:

1. custòdiat is propiedadis agrìculas chi is meris ddi ant donau a castiai, apustis de ai pagau unu currispetivu carculau cunforma a custu regulamentu;
2. traballat a manu de pari cun is autoridadis incarrigadas a sa protetzioni tzivili, a preveniri e poni arrefrenu a s’abigeau;
3. prevenit e ponit arrefrenu a is infratzionis in materia de scàrrigus de àliga tzivili e industriali e de abandonu de s’àliga me in àrea pùblica;
4. traballat a manu de pari cun is autoridadis incarrigadas a abillai e a tutelai in materia de custòdia de su patrimoniu de padentis e forestas, silvupastorali e, nau a mannu a mannu, de is àreas traballadas, in matèria de custòdia de su patrimoniu de s’acua in mesu a totu de sa preventzioni de incuinamentu, amparu de is parcus, àreas vinculadas e protègidas, frora e patrimoniu naturali, cassa e pisca, preventzioni e poni a arrefrenu is fogus;
5. custòdiat su patrimoniu comunali;
6. fait àteras funtzionis chi sa Giunta Comunali scerat cun delibera decidendi-ndi manera e durada;
7. traballat a manu de pari cun is fortzas de politzia locali po operatzionis apostas, candu ddu pedint autoridadis chi tenint sa cumpetèntzia e depit fai arrispetai is ordinàntzias e is regulamentus comunalis me in matèrias arremonadas asuba, privilegiendi s’atividadis de preventzioni;
8. traballat a manu de pari in totu is iniziativais contras a su fogu, arrispetendi s’ordinàntzia regionali e po custu ndi pesat, in puntus stratègicus de su territòriu, logus de càstiu, cun àterus sugetus, siat pùblicus che privaus, chi traballant in su territòriu comunali, apurat s’abruxada de is stulas
9. ponint in pràtica iniziativais deretas a custodiai s’interesa de su territòriu comunali, chi s’Amministratzioni Comunali partepari cun is Comunas lacanantis ponit a craru;
10. traballat a manu de pari a castiai su territòriu po preveniri e poni arrefrenu a is scàrrigus abusivus de àliga urbana, spetziali, tòssiga o chi noxiti; is santzionis de poni funt cussas chi is leis in matèria ponint in contu po is reatus;
11. custòdiat àterus benis pùblicus o privaus, fata chi siat cunventzioni apostas.

Is chi faint parti de is cumpangias barracellaris, in prus de is fainas chi a manera istituzionali ddis ant donau cunforma a custa lei, depint traballai a manu de pari, in s’àmbitu de is assinnamentus chi tenint cunforma a is normas in vigori, cun is fortzas de politzia de s’Istadu candu ndi apant fatu rechesta a su s’indigu, is autoridadis chi ndi tenint sa cumpetèntzia e cun sa Politzia Locali.

Candu faint custu tipu de traballu is incarrigaus de su servìtziu barracellari dipendint a manera operativa de s'autoridadi chi at pediu de ddus impreai.

Candu faint custu traballu is barracellus ant a depi privilegiai, po cantu fait, s'atividadi de preventzioni;

### **Art. 3 – Is chi cumponint sa cumpangia.**

Su nùmeru de is chi cumponint sa cumpangia, contendi is ufizialis non podit essi prus bàsciu de 10 (dexi) e prus artu de 150 (centucincuanta), apoderendi unu raportu de 1 (unu) a 10 (dexi) intra de is chi dda cumponit e is ufizialis, lassendi foras su Capitanu.

Is ufizialis de sa cumpangia funt 2 (duus) Visu Cumandantis in prus de unu nùmeru futu de Sutatenentis po cumpretai su raportu de 1 (unu) a 10 (dexi) cun is chi cumponint sa cumpangia.

Is graduauus funt 4 (cuatru).

Is ufizialis e is graduauus si nòminant cun sa manera chi s'art.5 stabilit.

### **Art. 4 – Is barracellus.**

Is candidaus a s'incàrrigu de barracellu depint teni custus rechisius:

- a – dexiotu annus fatus;
- b – gosai de is deretus tzivilis e polìticus;
- c – no ai tentu cundennas a penas detentivas po su delitu sena de voluntadi de noxi e de non ddu ai postu a misura de preventzioni;
- d – non nci ddu ai bogau de is fortzas armadas o de is corpus organizzaus a manera militari o destituiu de ufizius pùblicus;
- e – ai acumpriu sa scola de s'òbrigu o, sinuncas, ammostai de sciri ligi e scriri;
- f – no ai fatu parti de cumpangias passadas e de non ndi ai torrau is contus a sa scadèntzia posta in contu, ai abusau de is fundus e de ndi essi lassaus foras o arrevocaus;
- g – no essi consilleri comunali;
- h – idoneidadi fisica;
- i – si podi obrigai a manera bàlida e duncas de non ddu ai interdixu, inhabilitau o de no essi destinatàriu de provedimentu de nòmina de amministratori de sustènniu;
- j – patenti de ghia de categoria B.

Is rechisius de preferiri po sa nòmina funt:

1. Connoscèntzia de su territòriu e de s'ambienti comunali;
2. Ìndula a s'incàrrigu.

Is barracellus:

- depint bistiri a divisa e portai avatu sa patenti-tèssera de arreconnoscimentu chi at firmau su Sìndigu;
- depint apoderai unu spòntziu dinnitosu e portai sa divisa sèmpiri totu allichidida;
- non podint lassai su servìtziu sena motivu scusau; acontessendi impedimentu legìtimu, su Capitanu podit dispensai su barracellu de su servìtziu;
- non podint pigai a traballai agiudantis o a si fai rempratzai de àterus mancai sceti una scuta.

Est proibbiu a manigiai armas individualis me in is tzentrus abitaus e in ocasioni de manifestatzionis, sarvu candu faint servìtziu apostu chi ant ordinau e autorizau is Autoridadis de cumpetènzia chi ndi legìtimant s'apretu.

### **Art. 5 - Costituzioni de sa cumpangia**

Po constitui sa cumpangia, su Consillu Comunali desinnat su Capitanu, cun delìbera a scrutìnniu segretu e a majoria assoluta de is votus. Apustis comunicau a sa Prefetura ca ddui funt is rechisius po donai a su candidau, chi su Consillu at desinnau, sa calìfica de agenti de seguresa pùblica, su Sìndigu formalizat sa nòmina, fata chi siat sa giura ananti de issu etotu.

Aintru de 30 (trinta) diis de sa nòmina de su Capitanu, sa Giunta Comunali aprontat, de acòrdiu cun su Capitanu, s'elencu de is chi faint parti de sa cumpangia e ddu ponit a s'aprovamentu de su Consillu chi, apurau is rechisius de totus is chi ndi faint parti, delìberat sa costituzioni de sa cumpangia.

Su Sìndigu depit fai sciri a totu sa populatzioni de sa costituzioni fata de sa cumpangia cun formas de publicidadi apostu.

A is ufizialis e a is graduaus, ddu nòminant, a scrutìnniu segretu e a majoria de is votus, s'assemblea de is barracellus, cun Sìndigu o delegau suu a presidenti, cun s'assistènzia de su segretàriu chi sterrit verbali.

Acontessendi de torrai a cunfirmari sa cumpangia po is tres annus afatantis, su Consillu Comunali desinnat unu Capitanu nou, tenendi a contu tres nòminis chi s'assemblea de is barracellus a scrutìnniu segretu ant propostu.

Non podint pigai servìtziu is chi faint parti de sa cumpangia bàsciu de ai tentu sa calìfica de agenti de seguresa pùblica chi donat sa Prefetura. In su Decretu de assinnamentu de sa calìfica de agenti de seguresa pùblica s'inditat su tipu de armas chi is chi faint parti de sa cumpangia funt autorizaus a portai in servìtzius.

Aintru de 10 (dexe) diis de sa notìfica de su decretu de su Prefetu de sa calìfica de agenti de seguresa pùblica, totu is chi faint parti de sa cumpangia depint giurai ananti de su Sìndigu, chi firmat s'àu de nòmina, e de anca movint is tres annus de traballu de sa cumpangia, cun totu is prerrogativas e is responsabilidadi suas.

Totu is chi faint parti de sa cumpangia arricint una patenti-tèssera de arreconoscimentu (segundu is inditus de su Decretu de s'Assessori regionali de cumpetènzia) vidimada de su Sìndigu, chi ddu legìtimat a fai su traballu insoru.

Is chi funt mortus, dimissionàrius o lassaus foras si podint rempratzai cun is modus chi sa lei ponit in contu in s'art. 5 bis de custu regulamentu.

Sa cumpangia de norma fait is funtzionis suas aintru de su territòriu comunali; operatzionis foras de su territòriu si podint fai me in is bortas chi ddu narat sa lei.

### **Art. 5 bis – Intrada de àterus cumponentis**

In prus de is bortas chi stabilit su comma 9 de s'art. 5, po agiudai mellus su traballu chi fait sa cumpangia a favori de sa comunitadi, po ndi assegurai s'acumprimentu puntuali de is servìtzios istituzionalis e po ndi ammanniai is ocasionis de traballu a manu de pari cun is fortzas de politzia, si podit, cun delibera de su Consillu Comunali, mudai su nùmeru de is chi faint parti de sa Cumpangia Barracellari, postu in contu in s'art.3., ponendi in contu de fai intrai sugetus nous chi tenint is rechisius chi funt in su comma 1 de s'art. 4.

Is sugetus interessaus a intrai in sa cumpangia barracellari intregant istàntzia a su Comunu e aco a ddu ant a tzerriai po unu collòchiu motivatzionali punnau a ndi valutai s'indula a s'incàrrigu e sa connoscèntzia de su territòriu.

Su collòchiu si fait ananti de su Sindigu, de su Capitanu (o un'incarrigau suu) e de unu rapresentanti de s'Ufitziu Politzia Locali. S'incàrrigu de fai su verbali ddu tenit su Segretàriu de sa Cumpangia.

Su verbali cun s'arresurtau de su collòchiu si mandat a sa Giunta Comunali po ndi aprovai s'elencu de is sugetus idòneus e po proponi delibera a su Consillu Comunali, apustis de custa si s'ghit cunforma a s'art. 5 de custu regulamentu.

Sa nòmina a barracellu tenit efficacitadi sceti candu sa Prefetura assinnat sa califica de P.S. e candu si fait giuramentu, ammanchendi totu custu ndi arruit.

### **Art. 6 – Su Capitanu.**

Su Capitanu est a capu de sa cumpangia, dda arrapresentat, dda s'ghit e est responsàbili faci a su Sindigu de su servìtziu fatu beni, de sa disciplina e de s'impreu tècnicu-operativu de is barracellus e duncas fait is patullias, ddas càstiat, annotas is permissus, is ausèntzias, is infratzionis disciplinaris e is santzionis suas, donendi-ddi comunicatzioni a su segretàriu po ddas annotai in su registru de su personali.

Po ddu nominai a Capitanu, in prus de is rechisius po sa nòmina a barracellu, depit teni is rechisius chi s'ghint:

1. ai fatu 25 (binticincu) annus;
2. ai fatu parti de una cumpangia assumancu 5 (cincu) annus o ai prestau servìtziu su pròpiu tanti de tempus in calidadi de sutaufitziali e ufitziali me in is corpus de Politzia de Istadu, Guàrdia de Finàntzia, Arma de is Carabineris, Politzia Municipali;
3. teni un'esperientzia arreconnota de su territòriu e de s'ambienti comunali.

Sa cumpangia ponit a càstiu cun rondas aposta, a intra de dii e intra de noti, su sartu e is logus acanta a sa bidde, spartzendi-sì po su prus in patullias. Su Capitanu format is rondas, ddas coòrdinat, podit distacai, a s'abisòngiu, a totu is oras, unu nùmeru de barracellus chi abisòngiant po cali si siat operatzioni o servìtziu for a de su normali. Su Capitanu depit abillai s'andamentu de su servìtziu e assegurai su càstiu cun unu turnu de ispetzioni stàbili, totu de s'ghida e de òbrigu. Su Capitanu fait portai a càstiu a borta a borta cun is Barracellus is logus.

Acontessendi ausèntzia, impedimentu, suspensioni o arrèvoca, fait a càmbiu de su Capitanu s'ufitzialis prus antzianu.

### **Art. 6 bis – Cunvocatzioni de is barracellus**

Po fai is còmputis istituzionalis chi ponit in contu s'art. 2 e is servìtzios cuncordaus cun su Comunu e is fortzas de Politzia, su Capitanu o su delegau suu, finas po mesu de su segretàriu, atòbiat apari is barracellus po fai is fainas postas in contu.

Sa cunvocatzioni in servìtziu, a is atòbius de s'Assemblea de is Barracellus e po acumpri is fainas de aviamentu e de abisòngiu po fai is mansionis (bìsitas mèdicas periòdicas, esercìtzius de tiru e sighendi) si depint fai segundu a unu de custus sceberus chi fait ònnia barracellu:

1. comunicatzioni a telèfonu;
2. comunicatzioni a posta eletrònica;
3. comunicatzioni a su cellulari cosa sua cun aplicatzionis o messàgius.

Sa manera sceberada tenit balori de notìfica de sa cunvocatzioni e vùnculat su barracellu cuntatau, fadendi sarvas is bortas de impedimentu legìtиму, a acumpri sa s'atividadì pedida me in is modus e is tempus inditaus; acontessendi s'imbressi si àplicant is sanzionis chi nei funt in s'art.16.

S'ausèntzia fata apustis de s'essi cunvocaus est sèmpiri scusada po:

- is traballadoris totu cantu andat s'oràriu de sa prestatzioni chi imprassat duas oras prima e tres oras apustis su turnu de traballu;
- is sugetus in maladia, imprìngiu, parturàgiu, chi funt atendendi familliaris, in lutu.

Fadendi sarvu su chi s'est arremonau me in is paràgrafus passaus, po programmai mellus is fainas e po cuncordai, su Capitanu, is servìtzius, ònnia barracellu comùnìcat a su mesi is oràrius e is diis de disponibilitadi.

Su Capitanu, simmai cun s'agiudu de is ufizialis e de su Segretàriu, sterrit, po ònnia ocasioni de cunvocatzioni, s'elencu de is barracellus cuntataus annotendi sa manera de dduus invitai, sa disponibilitadi de ònniunu e su servìtziu fatu po deaveras.

#### **Art. 7 - Su Segretariu.**

Po is funtzionis tènicu-amministrativas-cuntàbilis sa cumpangia scerat su Segretàriu intra de is chi cumponint sa cumpangia cun diploma de scola mèdia superiori; sa nòmìna dda formalizat sa Giunta Comunali, a cunforma de sa delìbera de sa cumpangia. Candu niscinu de is chi faint parti de sa cumpangia tenit su titulu chi serbit o arrefudat s'incàrrigu, su Segretàriu si podit desinnai foras de sa cumpangia.

Candu su Segretàriu, apustis de eletzionis e fatas totu is proceduras, depit pigai s'incàrrigu de Capitanu de sa Cumpangia, s'at a depi fai agiudai de un'àteru incarrigau sceberau a norma de su comma 1, chi at a teni su rolu de Visu-Segretàriu.

Su Segretàriu atendit a is atòbius de sa cumpangia, ndi sterrit su verbali, allogat is scrituras cuntàbilis e tenit totu sa responsabilidadi de sa cumpilatzioni e custòdia fata beni.

Candu a su Segretàriu ddu nòmìnant in mesu de is chi cumponint sa Cumpangia si podit dispensai, pedendi-ddu cussu, de bistiri s'uniformi e de su servìtziu operativu.

Su Segretàriu manìgiat unu fundu de càscia de èurus 1.000,00 (milli) po is spesas pitias de amministratzioni ordinària, a custa manera:

- a) si fait unu mandau de anticipu de èurus 500,00 (cincuxentus) a favorì de su Segretàriu, chi s'at a incurai de dduus custodìai;
- b) is pagamentus si faint cun bonus chi firmant su Capitanu e su Segretàriu, de importu chi non sartat èurus 500,00 (cincuxentus);
- c) su Segretàriu ammostat su rendìcontu de is pagamentus a su Capitanu, de borta in borta, apustis aprovau su rendìcontu, su Capitanu disponit su reìntegru de su fundu càscia;

- d) de totu is baloris chi si manìgiant cun d'is fundu càscia su Segretàriu depit teni registru de intrada e de bessida.

Su Segretàriu depit s'ghiri s'oràriu de ufiziu cuncordau cun su Capitanu e si podit fai agiudai de unu o prus barracellus chi sa cumpangia incàrrigat.

Su cumpensu chi spetat a su segretàriu ddu càrculat in su provedimentu de nòmina s'assemblea de is Barracellus cunforma a sa difficultadi de s'incàrrigu e a is ùtilis de sa cumpangia.

Su manìgiu finantziàriu de sa cumpangia si fait s'ghendi unu bilànciu a s'annu de previsionis stèrriu in tèrminis de càscia, chi movit de sa data de intrada in servìtziu de sa cumpangia.

Sa gestioni de sa cumpangia est documentada me in is registrus chi tenit su Segretàriu:

1. registru de su personali innui s'at a depi annotai a sa dii:
  - is patùllias cumandadas in servìtziu;
  - is ausèntzias, is infratzionis fatas e is santzionis donadas;
2. registru de is denùntzias e de is apuramentus de ufiziu;
3. registru de is dannegiaus e de is dannegiadoris;
4. registru de is tenturas;
5. registru de is notìficas;
6. registru de is audièntzias barracellaris;
7. registru de is delìberas;
8. registru giorronali de càscia.

Is registrus in antis de ddus incingi tocat de ddus numerai a cadaunu follu e a nci ddus portai in Comunu po ddus firmai su Sìndigu o unu delegau suu chi ndi fait àutu in pei de s'ùrtimu follu.

Su Segretàriu at a depi ammostai, candu ddu pedit su Sìndigu, is registrus barracellaris e ddus at a depi intregai a s'acabbu de is tres annus de traballu a su Comunu.

A su 30 de làmpadas e a su 31 de su mesi de idas de ònnia annu sa cumpangia depit intregai a su Sìndigu unu rendicontu cuntàbili de su traballu fatu innui arresurtat su fundu càscia de acabbu; cun su rendicontu si depit intregai una relata a fini a fini de su traballu fatu e is tareas acumpridas.

Una còpia de su rendicontu dda at a depit mandai su Comunu a s'Assessorau Regionali de cumpetèntzia, un'àtera intregada in s'archiviu comunali e sa de tres abarrat in sa segreteria barracellari.

Su Sìndigu portat a càstiu su manìgiu cuntàbili e amministrativu de sa cumpangia; po custu podit disponit a ònnia ora verìficas de càscia e incarrerai a spriculai is registrus de càscia.

Su Segretàriu depit intregai candu si ddu pedit su Sìndigu is registrus de sa cumpangia e, acabbada sa gestioni, ddus depit intregai a s'archiviu comunali.

## **Art. 8 – Intradadas, spesas, ùtilis.**

Is intradas de sa cumpangia ndi arribant de:

1. is cumpensus de sa custòdia de is benis pùblicos;
2. is cumpensus e deretus de assicuratzioni;
3. is ùtilis tentus lassendi o bendendi su bestiàmini secuestrau;

4. is cuntributus finantziàrius chi entis pùblicus e privaus assinnant;
5. ònnia àtera intrada a norma de leis in vigori.

Is funtzionis de tesoreria de sa cumpangia ddas fait su tesoreri de su Comunu. S'incàsciu e is pagamentas si faint cun reversalis e mandaus chi firmant su Capitanu e su Segretàriu.

In antis de atacai cun sa spartzidura de is ùtilis, sa cumpangia depit pagai in òrdini:

- a. su cumpensu a su segretàriu;
- b. is spesas po certus, perìtzias de amministratzioni;
- c. is spesas de su servìtziu barracellari.

Is ùtilis de sa gestioni, ammenguaus de su cumpensu stabiliu po su Segretàriu, si spartzint intra de totu is chi faint parti de sa cumpangia, in custu modu:

- a. 15% (cuìndixi po centu) a su Capitanu;
- b. 7% (seti po centu) a is Ufitzialis;
- c. 4% (cuatru po centu) a su Sutatenenti;
- d. 74% (setantacuatru po centu) a totu is àterus chi abarrant de sa cumpangia chi ant fatu parti de sa ronda, cunforma a su servìtziu fatu.

A is chi faint parti de sa cumpangia chi in s'esercìtziu passau no ant mai fatu servìtziu non ddis cumpetit nisciuna cuota de ùtilis, de cuntributus e de prèmius.

Non si podint spartziri is ùtilis intra de is barracellus a balli asuba su fundu de garantzia, prima de licuidai e risarciri totu is dannus a is asseguraus e in antis de deliberai sa cumpangia e aprovai sa Giunta Comunali is rendicontus.

In su fundu de garantzia si podint fai anticipus de càscia, cun reìntegru, po parai faci a is spesas ordinàrias de funtzionamentu, finas a su 30% (trinta po centu) de sa dotatzioni.

In su fundu destinau a is spesas de funtzionamentu s'ammitint prelevamentus a tìtulu de acuntu.

Is contiendas intra de Segretàriu e sa cumpangia po spartziri is ùtilis ddas podit acabbai a manera amministrativa su Sìndigu.

### **Art. 9 - Responsabilidadi.**

Sa cumpangia est responsàbili candu incapitat fura o dannu chi no est de fogu po totu is benis asseguraus e po is chi funt acapiaus a cussus, contendi finas su bestiàmini custodiatu in logu acorrau o serrau a muru, a cresuri, a cora o àteru modu chi non ndi ddu potzat fai bessiri.

Sa cumpangia non torrat sceda de fura o dannus a benis chi ddi ant donau a castiai, candu ant cassau cun seguresa is autoris, cun sentèntzia passada in giudicau; me in is àteras bortas sa cumpangia torrat sceda de fura e dannus, sarvu atzioni de chitadura avatu a is responsàbilis.

De is obligatzionis avatu a is asseguraus sa cumpangia torrat sceda, serrendi s'esercìtziu finantziàriu, cun unu fundu de garantzia, spartziu in setzionis cunforma a su tipu de prestatzioni donada e fatu de su 70% (setanta po centu) de is intradas chi ddi pertocant.

Su 30% (trinta po centu) chi abarrat, impari a is intradas chi ndi bessint lassendi o bendendi su bestiàmini secuestrau o de cuntributus finatziàrius de entis pùblicus o privaus, fait de fundu mìnimu po is spesas de funtzionamentu.



### **Art. 10 – Apuramentu de violamentus.**

Me in is matèrias de cumpetèntzia, su Capitanu e is Uficialis podint incarerai a apurai violamentus de normas po chi ant postu in contu sanzionis amministrativas de pagamentu de una summa de dinai, ammostendi, candu ddu bolit sa personi interessada a s'apuramentu, sa patenti chi at firmau su Sìndigu.

Is violamentus si apurant cun verbali a tres còpias, chi depit portai is datus chi narat sa lei.

Aintru de 5 diis de s'apuramentu, una còpia de verbali si nci depit mandai a s'Ufìtziu de Politzia Municipali Locali, chi at a atendi a dda acabbai.

### **Art. 11 – Denùntzia de is curturas e de su bestiàmini.**

Aintru de 90 (noranta) diis de sa data de su manifestu cun chi su Sìndigu avisat a totu sa populatzioni s'intrada in servìtziu de sa cumpangia, is interessaus ant a intregai a s'ufìtziu de sa cumpangia denùntzia apostada de is terras agrìculas de propiedadi, sa denùntzia in forma de decraratzioni sustitutiva de àutu notòriu, chi fait e firmat su meri, depit inditai:

- su logu;
- su nùmeru de follu e de mapali;
- su tipu de curtura;
- su tanti de bestiàmini;
- assumancu duus lacanàrgius a cadauna terra.

Est de òbrigu sa denùntzia de is terras innui ammancat unu castiadori fissu; unu podit sceberai de denuntzias is terras serradas e is fràigus cun castiadori fissu. Còpia de sa denùntzia, cun firma de su Segretàriu, si torrat a su chi decrarat. Acontessendi de non bolli fai, su meri, sa denùntzia, sa cumpangia podit incarrerai de ufìtziu.

Po is meris chi non faint denùntzia me in su tempus e modu postu in contu, sa cumpangia podit cumpilai una denùntzia de ufìtziu e non pagai dannus; po custa arraxoni is barracellus podint intrai a is terras po fai is verìficas chi abisòngiant; a cadauna denùntzia de ufìtziu, si depit a sa cumpangia sa summa de èurus 13,00 (trexi); sa cumpangia fait sciri de s'apuramentu a su meri cun comunicau a arracumandada a/r; contas a s'apuramentu de ufìtziu su meri podit fai arrecursu a s'Ufìtziu Tècnicu comunali, aintru de 10 (dexi) diis de candu at arriciu su comunicau.

Sa cumpangia torrat sceda de is dannus a is curturas de sa data de sa denùntzia de su meri o de s'apuramentu de ufìtziu.

Su Segretàriu arricit sa denùntzia de curtura e de su bestiàmini e lassat a is chi faint denùntzia una politza chi issu etotu firmat, inditendi sa dii de sa denùntzia, totu is benis denuntzias, is tassas pagadas e sa registratzioni fata.

Sa cumpangia podit in sa gestioni sua torrai a castiai is denùntzias fatas e invitai a is chi ant fatu denùntzia a ddas retificai incapitendi de non dda ai fata o de no essi fieli. Acontessendi, su chi decrarat de regularizai sa denùntzia (aintru de 5 cincu) diis, s'àpricat una penali de su 10% (dexi po centu) cunforma a sa tarifa normali e po is omissionis feti; sinuncas, a sa denùntzia de retifica de ufìtziu s'at a apricai sa penali paris a duas bortas su prèmiu e sceti po is omissionis.

## Art. 12 – Furas e dannus.

Sa cumpangia torrat sceda de furas e de is terras chi tenit dunùntzia a norma. Sa denùntzia a sa cumpangia de furas e de dannus tentus dda depit fai sena sartai 5 (cincu) diis de s'apuramentu su chi at tentu su dannu. Incapitendi de no arrispetai su tempus o de non fai in totu o mali sa denùntzia, sa cumpangia no est obrigada a pagai indennitzu perunu.

Po chi sa cumpangia torrit sceda de is dannus a is mànigas de trigu, òrgiu, tzergas e muntonis de fàa, cìxiri, pisurci, gintilla e àxina, tocat chi su meri ndi fatzat denùntzia apena messau o tirau de terra, inditendi su nùmeru e su logu anca s'agatant. Sa cumpangia podit apurai s'esatesa de sa denùntzia. Su tempus chi custus frutus s'acostumant a lassai in terra no at a podi sartai is lùmitis afatantis, sartaus cussus acabbat sa responsabilidadi de sa cumpangia:

- 5 (cincu) diis po is mànigas de trigu, òrgiu, tzerga e muntonis de cìxiri, pisurci, gentilla e àxina;
- 20 (binti) diis po is tzergas de faa.

Sa cumpangia torrat sceda de sa linna segada me in is terras denuntziadas e de su sarmentu, bastit chi si ndi fetzat denùntzia comenti in su comma passau; sa responsàbidadi de sa cumpangia si sterrit a 10 (dexi) diis po sa linna ammuntonda e a 20 (binti) diis po is fascinas e po su sarmentu.

Is meris, po chi sa cumpangia torrit sceda de is dannus a is cosas de sartu, fadendi sa denùntzia depint, cun unu tènicu scerau de acòrdiu cun sa cumpangia e a spesa insoru, aprontai perìtzia a fini a fini.

Sa cumpangia non torrat sceda a is meris discoidosus candu arragollendi su frutu cumpriu lassant passai su tempus chi si narat in fatu, sarvu ecetzionis de cuncordai apari intra de assegurau e cumpangia:

- po sa faa, òrgiu, pisurci, gentilla, su 30 de làmpadas;
- po su trigu, su cìxiri, su 31 de su mesi de argiolas;
- po sa mèndula, su 15 de su mesi de ladàmini;
- po s'àxina, su 31 de su mesi de ladàmini;
- po sa figu morisca, fasolu, tamàtiga, su 30 de su mesi de onniasanti;
- po s'olia, su 28 de freàrgiu;
- po is agrùminis, su 30 de maju.

Si ndi buscant sanzioni amministrativa po non poni in menti a custus disponimentus:

- is chi nci passant o nci intrant, sena arraxoni scusada, me in is terras allenas, cali si siat sa curtura; is chi spicant de is matas e de is bìngias allenas cali si siat fruta o àxina; is chi in antis de acabbai sa binnenna arragollint tronis e srichillonis; a is chi non ponint in menti si àpricat sa sanzioni amministrativa de èurus 25,00 (binticincu), sarva s'atzioni penali;
- is chi, cassaus fadendi dannu de cali si siat arratza, boghendi erba o àteru me in is terras allenas; a is chi non ponint in menti si àpricat sa sanzioni amministrativa de èurus 25 (binticincu) in prus de su risarcimentu de is dannus, sarva s'atzioni penali;
- a is chi, cun cali si siat mesu mecànicu, po su prus tratoris, ddus cassant a passai a manera abusiva me in is terras allenas, candu no est de abisòngiu a ddui passai po intrai a unu cungiau po ddui traballai su tratori, candu est aici su tratorista depit sceberai de passai in sa bia prus curtza e una borta lòmpiu a su cungiau depit traballai sena de sartai làcanas; sanzioni amministrativa de èurus 30 (trinta), in prus de su risarcimentu dannus, sarva atzioni penali;
- is chi faint intrai su bestiàmini sena de amasedai po pasci in mesu a is giualis; a is chi non ponint in menti si àpricat sa sanzioni amministrativa de èurus 50 (cincuanta), sarva s'atzioni penali.

## **Art. 12 bis – Cunventzionis**

Sa cumpangia podit stipulai siat cun su Comunu siat cun is privaus unas cantu arratzas de cunventzionis. Custa cunventzionis s'ant a stipulai de borta in borta intra de is partis interessadas a segunda de is abisòngius tènicu-operativus chi serbint po fai beni su servìtziu.

Is cunventzionis cun su Comunu ddas at a aprovai sa Giunta Comunali. In antis de inghitzai a fai su servìtziu ogetu de sa cunventzioni, sa Cumpangia Barracellari depit stipulai cuntratu de assicurazioni aposta e a cunforma.

Sa Cumpangia torrat sceda inderetura de is infortùnnius e de is dannus chi iant a podi teni is chi ndi faint parti o àtera genti, o animalis e benis pùblicas e privaus. Sa Cumpangia in prus libertat su Comunu de totu is atzionis o sciringas de parti de àterus chi funt acapiadas a is atividadis fatas.

Is oràrius e sa frecuèntzia de is servìtzius ddus disciplinant is cunventzionis.

## **Art. 13 – Tarifas.**

Po totu is benis chi sa Cumpangia ndi depit torrai sceda si depit unu prèmiu de assicurazioni.

Su prèmiu est carculau aici:

- po totu is tipus de curtura € 0.10 a ha;
- totu is tipus de bestiàmini (siat mannu che minudu) € 0.01 a pegu.

Sa Cumpangia in prus torrat sceda, incapitendi, de dannus o furas po unu màssimu de su 20% de sa cuota chi ant pagau a s'annu is assegraus.

Sa Cumpangia est obrigada a fruniri is servìtzius stipulendi unu cuntratu de assicurazioni po chi sa pròpia torrat sceda de is dannus e de is benis chi ddi ant afidau (art. 19 L.R. 25/88), po ddus castiai e custodiai is meris funt obrigaus a pagai unu cumpensu (prèmiu) a sa Cumpangia (cunforma a s'art. 4 de sa L.R. 25/88).

Incapitendi Cunventzionis stipuladas cunforma a s'art. 12 bis de custu regulamentu sa Cumpangia at a podi arribai a acòrdius e a cunditziunis diversas de is prèmius postus in contu me in commas passaus cunforma is abisòngius tènicu-operativus.

Asuba de is pagamentus fatus a tardu de is cumpensus e de is deretus de assicurazioni sa cumpangia àpricat s'interessu in misura paris a su tassu legali; is deretus non pagaus aintru de unu mesi de scadèntzia si incàsciant cun rolu, cun is formalidadis postas in contu po is tributus comunalis.

Incapitendi denùntzia innui is benis denuntziaus tirant, de misura, a manera differenti de cussa de sa realidadi, su meri depit pagai a sa cumpangia una maggiorazioni de is cumpensus e deretus de assicurazioni paris a su 20% (binti po centu).

Su Consillu Comunali podit mudai ònnia tres annus is tarifas de is cumpensus e de is deretus de assicurazioni chi spetant a sa cumpangia, e is indennidadis de risarcimentu de is dannus. Po incasciai is cumpensus e is deretus de assicurazioni si àpricant is normas in matèrias de tributus comunalis.

Is cumpensus e is deretus de assicurazioni si depint pagai totu in una arrata assora de denuntziai, o in duas arratas, una assora de sa denùntzia e sa segunda a sa scadèntzia de is ses mesis afatantis.

### **Art. 13 bis – Tarifas po servìtzius frunius a su Comunu**

Is tarifas frunidas a su Comunu finas ponendi in pràtica Cunventzionis stipuladas cunforma a s'art. 12 bis de custu regulamentu, ddas stabilit sa Giunta Comunali.

### **Art. 14 – Indennidadi po dannus.**

Is indennidadi po dannus si pagant a is asseguraus candu si serrat s'esercìtziu finantziàriu, cun una franchìgia de èurus 25,00 (binticincu); duncas, po is dannus prus pagus de custu tanti non si depit nudda, de contras po dannus prus artus s'at a pagai un'indennidadi paris a su dannu peritziau bogau de s'importu de sa franchìgia.

Po sa perìtzia e sa stima de is dannus a is benis asseguraus est postu in contu s'agiudu de espertus, unu perparti. S'acòrdiu de stima de is espertus càrculat su tanti de su dannu. Is spesas de perìtzia funt a càrrigu de is partis. Acontessendi de non si poni de acòrdiu, pedendi-ddu in acòrdiu is partis, si podit fai pigai sa decisioni a unu àrbitru, segundu ecuidadi, cun s'agiudu e assistèntzia de duus peritus chi inditant is partis.

A s'àrbitru ddu nòminat su Consillu Comunali cun proposta de sa Giunta, abarrat in càrriga cantu abarrat sa cumpangia e si podit torrai a cunfirmari; is rechisius po si fai nominai a àrbitru funt custus:

- teni is rechisius po s'eletzioni a Consilleri Comunali;
- teni sa residèntzia e sa dimora bera in su Comunu de Santa Justa;
- essi personi capassa de fai a manera d'innia s'incàrrigu, po rechisius arreconnotus de onestadi, caràteri e prestìgiu.

Po poni a craru is contiendas s'àrbitru si giuat de duus peritus chi is partis ant inditau; a s'àrbitru ddi tocat un'indennidadi, chi ferrit in misura aguali me in is partis, stabilida aici:

- a cadauna perìtzia èurus 35,00 (trintacincu);
- po s'indennidadi de trasferta a km 1/5 (unu asuba de cincு partis) de su costu a litru de benzina "super".

### **Art. 15 – Deretus de tentura.**

Sa cumpangia, candu agatat bestiàmini a su passiu in terrenu allenu, ddu depit custodiar e abillai po non ddis fai fai dannu in prus a àteri, avisendi in s'interis a is meris. Po su bestiàmini tenturau su meri at a pagai a sa cumpangia po is deretus de tentura su tanti chi sighit:

- de èurus 25,00 (binticincu) a èurus 500,00 (cincuxentus) – finas a 50 (cincuantu) pegus berbexinus o crabinus, in pascidòrgiu sena de fruta pendi-pendi;
- de èurus 50,00 (cincuantu) a èurus 500,00 (cincuxentus) – de 51 (cincuantunu) a 150 (centucincuantu) pegus berbexinus o crabinus, in pascidòrgiu sena de fruta pendi-pendi;
- de èurus 75,00 (setantacincu) a èurus 500,00 (cincuxentus) – sartaus is 151 (centucincuantunu) pegus berbexinus o crabinus, in pascidòrgiu sena de fruta pendi-pendi;
- de èurus 25,00 (binticincu) a èurus 500,00 (cincuxentus) – finas a 10 (dexi) pegus berbexinus, cuaddinus o porcinus in pascidòrgiu sena de fruta pendi-pendi;

- de èurus 50,00 (cincuanta) a èurus 500,00 (cincuxentus) – de 11 (ùndixi) a 20 (binti) pegus bòinus, cuaddinus o porcinus in pascidòrgiu sena de fruta pendi-pendi;
- de èurus 75,00 (setantacincu) a èurus 500,00 (cincuxentus) – sartaus is 21 (bintunu) pegus bòinus, cuaddinus o porcinus in pascidòrgiu sena de fruta pendi-pendi;
- de èurus 35,00 (trintacincu) a èurus 500,00 (cincuxentus) – finas a 50 (cincuanta) pegus berbexinus o crabinus, in tancas o cun fruta pendi-pendi;
- de èurus 40,00 (coranta) a èurus 500,00 (cincuxentus) – de 51 (cincuantunu) a 150 (centucincuanta) pegus berbexinus o crabinus, in tancas o cun fruta pendi-pendi;
- de èurus 60,00 (sessanta) a èurus 500,00 (cincuxentus) – sartaus is 151 (centucincuantunu) pegus berbexinus o crabinus, in tancas o cun fruta pendi-pendi;
- de èurus 30,00 (trinta) a èurus 500,00 (cincuxentus) – finas a 10 (dexi) pegus bòinus, cuaddinus o porcinus in tancas o cun fruta pendi-pendi;
- de èurus 60,00 (sessanta) a èurus 500,00 (cincuxentus) – de 11 (ùndixi) a 20 (binti) pegus bòinus, cuaddinus o porcinus in tancas o cun fruta pendi-pendi;
- de èurus 80,00 (otanta) a èurus 500,00 (cincuxentus) – sartaus is 21 (bintunu) pegus bòinus, cuaddinus o porcinus in tancas o cun fruta pendi-pendi.

Is deretus de tentura si depint pagai aintru de 30 (trinta) diis de sa notìfica. Incapitendi recaida su deretu de tentura est duas bortas tanti; in prus de is deretus de tentura, spetant a sa cumpangia po su bestiàmini custodiu e abillau is spesas de custòdia e apoderamentu:

- pegus bòinus, cuaddinu e porcinus èurus 5,00 (cincu) a sa dii a pegu;
- pegus berbexinus e crabinus èurus 2,00 (duus) a sa dii a pegu;
- s'indennidadi de acumpangiamentu de èurus 10,00 (dexi) a ora po s'atendimentu a cadaunu barracellu chi tenturat.

Is deretus de tentura si depint spratziri intra de is chi faint parti de sa cumpangia cunforma a su servìtziu fatu.

Sa cumpangia, ponendi in menti a s'òbrigu de custòdia e vigilàntzia, depit avisai a su meri, candu si connoscit, po ndi pinnicai su bestiàmini e po pagai sa sanzioni a dinai; sinuncas ddu fait sciri a is autoridadis de competèntzia.

Su meri chi non ndi pinnicat su bestiàmini aintru de 24 (binticuatu) oras de sa notìfica depit pagai a sa cumpangia sa sanzioni a dinai de 50% (cincuanta po centu) de is deretus de tentura.

Su pastori chi portat bestiàmini, candu si ddu pedint, depit ammostai a is barracellus s'elencu de is pasturas cun firma de sa cumpangia po chi ndi allogat in ufìtziu s'autorizatziuni o su permissu de is meris suus. Acontessendì de no essi aici o suspetu de pasci sena de deretu, su bestiàmini si depit tenturai e tocat de ddu fai sciri a su meri de sa terra. Is permissus chi scriint is meris depint inditai a craru su logu, su tanti chi tirat, is lacanàrgius, sa natura de su pascidòrgiu, sa data de inghitzu e de acabbu de sa cuncessioni. Incapitendi bestiàmini o de apurai dannu o reatu me in is propiedadis asseguradas, sa cumpangia depit avisai a su meri de sa terra aintru de 3 (tres) diis de s'ora de ddu ai apurau. Sa cumpangia depit sinnali a iscritu a s'ufìtziu de Politzia Municipali Locali totu is dannus procuraus a is propiedadis comunalis e simmai is infratzionis a is ordinàntzias e regulamentus comunalis.

Is allevadoris depint sinnalai in antis a sa cumpangia is logus anca ant a pasci su bestiàmini e ònnia àteru tramudu de importu in logus chi non funt a làcana. Su pastori aciapau sena de billetu de passai o chi no apat fatu sciri a sa cumpangia su tramudu de su bestiàmini si ndi buscat sa sanzioni amministrativa in custu modu:

- de èurus 25,00 (binticincu) a èurus 500,00 (cincuxentus) – finas a 50 (cincuanta) pegus berbexinus e crabinus;

- de èurus 50,00 (cincuanta) a èurus 500,00 (cincuxentus) – de 51 (cincuantunu) a 150 (centucincuanta) pegus berbexinus e crabinus;
- de èurus 75,00 (setantacincu) a èurus 500,00 (cincuxentus) – sartaus is 151 (centucincuantunu) pegus berbexinus e crabinus;
- de èurus 25,00 (binticincu) a èurus 500,00 (cincuxentus) – finas a 10 (dexi) pegus bòinus, cuaddinus e porcinus;
- de èurus 50,00 (cincuanta) a èurus 500,00 (cincuxentus) – de 11 (ùndixi) a 20 (binti) pegus bòinus, cuaddinus e porcinus;
- de èurus 75,00 (setantacincu) a èurus 500,00 (cincuxentus) – sartaus is 21 (bintunu) pegus bòinus, cuaddinus e porcinus.

Candu s'infrazzioni si fait a su noti, s'at a apricai duas bortas tanti sa santzioni in chistioni.

Su Capitanu podit peliai a is meris o a is chi portant bestiàmini furisteri una cautzioni a garantia de dannus chi iant a podi acontessi, in sa misura de èurus 1,00 (unu) a pegu minuadu e de èurus 5,00 (cincu) a pegu mannu, de torrai apustis de ndi ai pinnicau su bestiàmini de su sartu de su Comunu e de ai apurau ca no ant fatu dannu perunu.

### **Art. 16 – Infrazzionis, santzionis disciplinaris e s'escrusioni de sa cumpangia barracellari**

Is barracellus chi non faint su doveri insoru si ndi buscant custas santzionis disciplinaris:

- a) ammonimentu po sa farta fata, cun s'invitu de non ddu torrai a fai;
- b) santzionis a dinai;
- c) suspensioni de su servìtziu cun pèrdida de su deretu a sa cuota de is ùtilis;
- d) escrusioni de sa cumpangia.

S'ammonimentu dda fait narendi-ddi cosa su Capitanu po trasgressionis lèbias.

Sa santzioni a dinai de èurus 50,00 (cincuanta) dda donat su Capitanu po is violamentus chi funt in s'art. 4 e in s'art. 6 bis, e po discòidu malu in su servìtziu, po si portai mali cun is superioris, po violamentu de su segretu de ufìtziu, po cumportamentu chi non dexit.

Sa suspensioni dda delìberat sa Giunta Comunali cun proposta de su Capitanu, apustis chi s'assemblea de is Barracellus at fatu sa delìbera po ai intèndiu a s'interessau; si tratat de abarrau atesu de su servìtziu assumancu 1 (unu) mesi e non prus de 6 (ses) mesis me in is bortas chi si ponit in contu sa santzioni a dinai po infrazzionis mannas, po ai pigau cantzoni a is superioris, po impreai s'incàrrigu po punnas privadas, po abandonu voluntàriu de su servìtziu, po violamentu de su segretu de ufìtziu candu apat fatu dannu meda.

S'escrusioni dda proponit su Capitanu cun delìbera de s'assemblea de is Barracellus acontessendi:

- de torrai a fai violamentus de is òbrigus e doveris postus in contu in s'art. 4 e in s'art. 6 bis;
- de non rispetai, sena de motivu scusau, s'invitu a ammostai totu is certificaus agiornaus innui s'atestat s'idoneidadi psicu-fìsica a manigiai is armas chi funt in su D.M. de sa Sanidadi de su 28.04.1998 (o de còpia de cussa chi giai s'est fata in Cuestura candu s'interessau titulari de una licèntzia de portu de armas apat giai fatu in s'annu certificaus simbili);
- de non frequentai, sena de motivu scusau, e de no ai passau su cursu a s'annu de letzionis regulamentaris de tiru a sènniu natzionali;

- de si portai mali, finas foras de s'oràriu de servìtziu ingendrendi una situatzioni de reatu e/o chi no andat de acòrdiu cun s'incàrrigu tentu;
- preitza e omissioni de su servìtziu po unu tempus chi sartat is 4 (cuatru) mesis sena de motivu scusau (non si càrculant is simanas de maladia, imprìngiu, parturàgiu, lutu, atendumu a familliaris...);
- de non podi e no essi capassu de traballai cun is àterus de sa Cumpangia po scòrrius e cumportamentus chi funt contras a is princìpius de unidadì, lealidadi, curretesa e agiudu a manu de pari;

Candu est aici a s'interessau ddu tzèrriant po ddu ascurtai su Sìndigu (o delegau), su Capitanu (o delegau), unu rapresentanti de s'Uftziu Polìtzia Locali. S'incàrrigu de sterri verbali ddu tenit su Segretàriu de sa Cumpangia. Su Segretàriu sterri verbali apostu, innui si arremonant is declaratzionis arricidas e nci dda mandat a sa Giunta Comunali.

S'escrusioni dda delìberat sa Giunta Comunali po mori de is arresurtaus de su verbali de s'auditzioni o po no ai rispetau s'invitu a si fai ascurtai. Contras a sa decisioni de sa Giunta s'ammitit arrecursu de s'interessau aintru de 30 (trinta) diis de sa notìfica. Su Consillu Comunali, pigat cun delìbera sa decisioni definitiva aintru de 60 (sessanta) diis e incapitendi de cunfirmar s'escrusioni acetat sa cumpositzioni noba de sa Cumpangia Barracellari.

S'escrusioni tenit efetu deretu e ingendrat sa pèrdida de sa parti de is ùtilis de sa cumpangia finas po is servìtzius fatus.

Contras a sa sanzioni a dinai e sa suspensioni s'ammitit aintru de 30 (trinta) diis de sa notìfica arrecursu a sa Giunta Comunali, chi deciddit aintru de 60 (sessanta) diis, intèndiu a s'interessau.

Is chi faint parti de sa cumpangia chi ddus ant postus a provedimentus penalis, po precautzioni, candu sa natura de su reatu est gravi meda, si podint suspendi de su servìtziu cun provedimentu de sa Giunta Comunali e arrevocai candu ndi ant pronuntziau sentèntzia de cundenna. Su provedimentu de suspensioni est de òbrigu candu avatu de cussus ndi ant bogau mandau o òrdini de arrestu.

Su Capitanu chi fait infratzionis inditadas asuba si podit suspendi e acotessendi is bortas prus gravis si podit arrevocai cun delìbera de su Consillu Comunali, intèndiu a s'interessau; sa suspensioni e s'arrèvoa si faint cun is efetus e is tempus chi funt stabilius po is barracellus.

### **Art. 16 bis - Contiendas**

Is contiendas intra de is chi faint parti de sa Cumpangia ddas podit acabbai a manera amministrativa su Sìndigu apustis chi su Capitanu ndi at fatu raportu spieghendi, ponendi-nci totu is documentus chi abisòngiant po valutai sa chistioni.

### **art. 16 ter – Dimissioni de su Capitanu e de is chi faint parti de sa Cumpangia**

Is dimissionis de s'incàrrigu de Capitanu o de cumponentis de sa cumpangia barracellari si depint intregai de personi e inderetai impari a s'Assemblea de is Barracellus e a su Comunu de Santa Justa po ddas protocollai. Cussas si podint arrevocai aintru de 10 (dexi) diis de s'intregu e tocat de ddas acetai su Consillu Comunali po ndi torrai a carcalai su nùmeru de is chi faint parti de sa Cumpangia.

### **art. 16 quater - Acabbu de sa Cumpangia Barracellari**

S'acabbu de sa Cumpangia Barracellari dda delìberat su Consillu Comunali cun proposta de sa Giunta:

- candu ddui at motivus de gravidadi manna;
- po ai aparau ca sighiat a non funtzionai beni su traballu de cussa etotu

- candu su tanti de is chi donant is dimissionis portit a prus pagu de 10 (dexi) su nùmeru de is chi faint parti de sa Cumpangia.

### **Art. 17 - Riferimentus**

Po totu cussu chi non s'est postu in contu in custu regulamentu, si fait a arriferimentu a sa lei.  
Còpia de custu regulamentu si mandat a s'Assessori Regionali a is Entis Localis, Finàntzias e Urbanìstica, aintru de 15 (cuìndixi) diis de candu si ponit in pràtica.